

Segun Mike Eman rabia di algun ta pone cu nan no kier compronde mision planea

Green Conference ta cubri e mision di Wubbo Ockels na Aruba

ORANJESTAD – “E sunnan cu no por capta e balor di un bishita manera esun di e astronauta hulandes Wubbo Ockels, sea e capacidad intelectual no t'ey pa compronde con importante e cos aki ta of e rabia contra tur local ta Hulanda of Hulandes of di e gobierno aki ta asina grandi cu bo no ta importa pa nenga cu e cos aki tin balor” ta declaracion di Prome Minister Mike Eman riba e biahe di e ex astronauta cu ta sali awe rumbo pa Aruba.

Pa basta tempo por tende varios hende den comunidad y tambe partidonan politico ta

critica e bishita di e ex astronauta Hulandes, y no por caba compronde e motibo y porta e empeño di e gabinete aki pa trece e persona pa Aruba. Como tal e asunto a keda trata cu Prome Minister Eman pa clarifica e asunto aki. Un otro punto ta e gastonan cu pais Aruba tin cu paga pa –manera cu hopi ta yama e biahe aki – ‘e aventura’ di Gabinete Eman.

Premier Eman ta muestra cu e gastonan ta wordo financia completamente pa “Green Conference” pero no ta bisa cuanto esaki ta si. Por

corda cu entrada pa e conferencia aki tabata \$750 pa persona, y por a nota cuanto carhi a wordo bendi. “E costonan ta wordo carga pa e Green Conference” Eman a confirma na BON DIA ARUBA, y durante tres luna e lo keda Aruba durante cual e lo tene lecturanan cu tambe mester rindi basta entrada pa por yuda cubri e gastonan di henter e mision aki. Hopi comerciante y hotel ta interesa segun Eman pa Ockels tene un lectura tematico riba cambio di energia alternativa cu por beneficia e negoshinan aki. □

Conocido ex astronauta Hulandes ta cambia fecha di biahe

Diadomingo awor Wubbo Ockels ta sali rumbo pa Aruba



Bista di e yate di Wubbo Ockels.



Wubbo Ockels cu su tripulacion prome cu nan sali pa Aruba.

DEN HAAG - Despues di hopi anticipacion, e conocido astronauta Hulandes Wubbo Ockels y su barco di bela di cero emision Eco-lution ta cla pa sali di e waf di Scheveningen pa haci e biahe grandi riba oceano pa bin Aruba. E biahe mester a tuma lugha diabierna dia 2, pero pa motibo di mal tempo a cambia e fecha aki por lo pronto pa diadomingo dia 4 di november. E ultimo simannan e team di Ockels a traha duro pa prepara e barco pa e biahe aki. Prome cu nan haci e biahe pa Aru-

ba nan ta bay cu e barco Eco-lution riba Noordzee pa haci algun test cu falta ainda y pa wak tambe si e tripulacion ta bastante prepara pa traha cu otro. Pa e barco di cero emision Eco-lution esaki ta su prome biahe transatlantico cu ta pasa via Islanan Canarias y Antigua pa caba medio december den waf di Oranjestad. E estudiante Arubano di TU Delft Javier Sint Jago, kende a bira conoci aki como e ingeniero y coredo di e auto solar Nuna cu e Solar World Race na Australia a yega

na di dos lugha, tambe ta forma parti di e tripulacion. Despues di su yegada Eco-lution ta keda tres luna den waf di Oranjestad. E guru di sostenibilidad Ockels durante e periodo aki ta bay desaroya varios proyecto pa sostene e maneho di durabilidad di Gabinete Mike Eman.

Aruba tin e ambicion pa no mas tarda cu 2020 haci su economia 100% duradero. Construyendo un di dos parke di molina di biento y poniendo panelnan solar riba e tereno di parkeo di aeropuerto, ta haci cu

ya pa 2013/2014 e isla ta draai pa casi 50% riba energia berde. Pa haci e stap na 100% gobierno di Aruba a cera acuerdonan di cooperacion cu entre otro Carbon War Room di Sir Richard Branson, The New America Foundation, Harvard y TNO Hulanda. Como tata spiritual di e movimiento Happy Energy ex-astronauta Ockels ta muestra e comunidad di Aruba, tanto e consumidor como e comerciante, cu durabilidad

ta algo cu henter sociedad por tin probecho di dje y cu e ta algo ‘leuk’ tambe. Pero prome cu esaki ta bay tin un despedida oficial di Eco-lution. Habitantenan di Scheveningen ta wordo pidi pa sali di nan cas y bin waf pa yama ayo na Eco-lution cu pronto ta cuminsa cu su mision rumbo pa Aruba. Doñonan di yate a wordo invita pa compania Eco-lution te na salida di waf di Scheveningen. □